

## Von Bestellung eynes Meyerhofs. II

füße frische Wasser / vnd zu zeiten Mörwasser / welche den Leuten wol eintragen. An andern / da die Erd oberhalb nicht fruchtbar ist / da trägt sie doch vnterhalb Steyn / Erz / Metall / vnd ander Bergwerckstuck / die man vñ bessers oder nötigers verhandlen oder vertauschen kan.

Darvñ so laßt vns an dem benügen / was das Ort gibt / an welchem wir wohnen müssen / vnd vnser Hüttlin auffschlagen. Ist es gleich nicht aller ding solcher massen geschaffen / als es jnen fürwitzige vnd vnersättliche Leut wünschen / sollen wir doch dahin arbeiten / das wirs durch die mittel / so nachfolgendts erzehlet werden / verbessern.

Sintemal sehr wenig Meyereien sint zu finden / die an solchen enden sint gelegen / da gar nichts zutadeln ist: Als an ebenen erhöchten orten ist mangel an Wasser: wie dann inn Franckreich auff der Champani vnd inn Beauserland solchs zusehen.

Im Teutschland aber auff den Alpen / am Alpbuch vnd Härtenfeld im Schwabenland / vnd gar nach die ganz Alp auff der seiten der Tonaw hinab biß gen Vlm. Desgleichen im Kleggaw / welches außershalb des Wassers Butach auff zwo meilen weit vnd breit keyn Wasser hat / vnd andere Ort / die hie einzuführen zu weitläuffig weren: Eyn jeder kan solche gelegenheit täglich an besonderen Plätzen / Gütern / vnd gegenen absehen vnd warnemmen.

Auch geschichts wol an örtern / die bodensfest / vnd an erhechten bergigen Orten gelegen sindt.

Hinwidervñ hat es vberfluß von Wasser inn absteigenden langen Thälern. Als inn vilen enden inn Saffoy / inn Delphinat / inn Avernien vnd Gasconien.

Vnd bei vns inn Teutschland gar nach durch ganz Schweizerland / welches inn seinen Thälern also Wasserreich ist / das darauß die größte vnd fürnemste Fluß in Teutschland vñ Franckreich fließen. Desgleichen sieht man auch in den Ungarischen gebürgen.

Aber an solchen orten hat es vil mehr Viechweyd vnd Matten / als Feldfrucht oder Kornacker.

Etlich End sint von Natur sandig / als inn Franckreich gegen Estampes / Sanct Naurin / inn Solongne / Landes / zc.

Vnd inn Teutschland vñ Nörenberg inn Francken / vñ Hagenaw im Etsaß / vnd anderswo an vilen Orten.

Welche örter gleichwol wasserig vnd feucht genug sint.

Ander end sint kreidecht vnd leytnig / wie gegen Remis / Troie vnd Schalon inn Champanien.

Kreidechter Länder sind man kaum eyns in Teutschland: aber an den grossen Landflüssen vil leytnigen boden: wie dann zusehen an beyden seiten des Rheins / da er zwischen Bergen nicht eingefangen ist / sonder inn der ebene rinnet / vnd deshalb sehr einreisset. Wie es dann auch scheinbar ist vñ Straßburg: daher etlich Gelehrte gemeynt haben / Argentina heißt so vil als Argenton / vnd kommt vom Argem / welches bei den alten Teutschen eyn Leynigruben oder weychen grund / oder Latinsch argillam hat geheissen / wie auch bei den Griechen Argos, eyn leynecht gegene / oder eyn ebene gegen einem grossen Wasser be- deitet: darvñ auch von solcher gelegenheit das Land Argos vnd die Argiui inn Griechen sint genannt worden.

Sonst ist auch hiebei zu mercken / das die Wasser so gegen Mitternacht fließen / allzeit mehr leynecht sint / als die gegen Mittag oder Morgen fließen: daher ist der Rhein / so gegen Nozt rinnet mehr vnd fernner fruchtbar als die Tonaw / so gegen Ost lauffet: Sinte- mal die leynechte Gegene darvñ nicht des böser sint / dieweil sie gemeynlich inn der nähe mit anderem grund sich temperieren / vñ also eyn rechte fruchtbare Landschaft verursachē.

Etliche sind felsig / als gegen Sanct Leu von Serans / Tonnoire inn Bezeley / im Delphinat / vnd gegen Konzeval / da mancherley art Marmelsteyn gebrochen werden.

Felsige gegene hat man genug zuspüren am Schwarzwald hin vnd wider / welcher sich in Europa von eym Nozt zu dem andern erstreckt / vnd wie Munsterus recht schreibt /

Erhöcht öst-  
ter on Was-  
ser.

Auf der Alp  
im Schwab-  
enland.  
Kleggaw.

Lange Tal.

Schweizer-  
land.  
Ungarisch  
Gebürg.

Nörenberg.  
Hagenaw.

Kreidecht-  
ter Boden.

Leimechter  
grund.  
Reinstrom.  
Straßburg  
wahr es  
genannt  
nach meyn-  
ung D. J.  
S. G. M.

Die Wasser  
so gegen  
Nozt rinnet /  
sindt frucht-  
barer als  
die gegen  
Mittag od  
Morgen.  
Felsiger  
Boden.  
Schwarzw-  
wald.